

Siunnersuut uunga: Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaat
(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Saqqummiussissut

Siullermeerneqarnera

Naalakkersuisut sinnerlugit matumuuna saqqummiutissavara Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaannut siunnersuut.

Siunnersuummi anguniarneqarpoq toqqaannarnerusumik ataqatigiissaariniarnermik pisariillisaaniarnermillu ilinniartitaanerni politikkami siunnerfiusunik, anguniakkanik aammalu suliniutinik pilersitsinissaq, matumanissaq inuiaqatigiinni ajornartorsiutinik isornartunik iliuuseqarfigisariaqartunillu ilinniagaqartut sungiusaammik suliffeqarnissaannut tunngasuni, inuusuttuaqqanut immikkut sullinneqartussanut siunnerfigisatsinnut tunngasuni aammalu nunatsinni qitiusumik ilinniarfiit ingerlatsinerannut tunngasuni. Ilanngullugulu aamma siunnersuut qitiusumik ilinniarfinni aningaasaqarnikkut iluameersumik aqutsisinnaalernissaq qulakkeerneqassaaq. .

Inatsisissatullu siunnersuummik matuminnga suliaqarneq ilutigisaanik isiginiarneqassaaq tunuliaqataralugit misissuinerit paasineqartut inuussutissarsiutinik ilinniartitsinerit pillugit 2011-imi aaqqissuusseqqinnerup sutigulluunniit inuussutissarsiutinik ilinniartitsinerit siuariartorfiusimannginnera iluaqutaasussanillu pilersitsiviusimannginnera taamani aaqqissuusseqqinnerit siunertarisimasaattut.

Ilanngullugulu naliliisoqarpoq ukiuni aggersuni suliffeqarnermi unammilligassaalersussat nutaanik ilinniarsimasut pisariaqartinneqartut suliffeqarnermilu pisariaqartitsinerit naapertuutinningsumik ineriartorfiusinnaanerisigut, nunatsinni innuttaasut katitigaanerisa allanngoriartorerisigut pisariaqartitsiviulertussaasut siunnerfilersugaasunik, tulleriarinertalinnillu ilinniartitaanertigut neqeroorutaasunik naleqqussaasoqartarnissaa, nunatsinni tamarmi pisariaqartitsinerit isiginiarlugit aaqqissuussaasunik. Ilutigisaanillu annertunerulertussaavoq pisariaqartitsinerput pissutsit atuuttut pissusiisa qitiusumiit nakkutiginnissaannut qitiusumiillu ataqatigiissaarisarnissatsinnik.

Siunnersuummi siunertaavoq qitiusumik nunatsinni ilinniarfiit allaffissuaqarnikkut aaqqissuussinitta iluanut uterteqqinneqarnissaat, taamaasillunilu ilinniartitaanernik

ingerlatsiviit taakkua inatsisilerinikkut Namminersorlutik Oqartussat iluanni inissisimaleqqinnissaat, allaffissornikkut aqqissuussinitta nalinginnaasut iluanni, assigalugit Ilinniarnertuunngorniarfiit. Qitiusumik Ilinniarsiit ingerlatsinerat, matumanissaaq periusissiaat, anguniagaat aamma naammassisassanut pilersaarutaat taamaasillutik qitiusumi ilinniartitaanikkut politikkimut anguniakkanullu qaninnerulissapput.

Tamatumunngalu tapiliullugu naatsorsuutigineqarpoq qitiusumik ilinniartinnut avataaneersunik suliatiqut imaluunniit fagitiqut iluaqutissat ilinniartitaanernut siunnersuisoqatigiulersussat aqutigalugit tunniunneqartarumaartut, naatsorsuutigineqarlunilu siunnersuisoqatigiit soqutigisaqarunik naleqquttunik inuttalersugaanissaat, piginnaanerillu pigilikkat aallaavigalugit ilinniartitaanerni suliassaqarfiup iluani inassuteqaatinik tigussaasunik suliaqartassallutik. Tamatuma saniatiqut periarfissaalissaaq pisariaqartitsinernik piusunik tunngaveqartunik suliffeqarfinni ilinniagaqartunik tigussisussat akornanneersunik suleqatigiissitanik panelinik ataatsimiititalianillu inuussutissarsiutit sammiviinut immikkoortunut aalajangersimasunut tunngatillugu pilersitsisoqartarsinnaalernissaq.

Kiisalu siunnersuut aamma imaqarpoq sungiusaammik suliffissanut ataqatigiissaarivimmik pilersitsinissamik ingerlatsinissamillu, qularnaarumallugu suliffeqarfinnut orniguttarluni ilinniagaqartut sungiusaammik suliffissaannik pilersitsisoqartarnissaanik.

Taamatut oqaaseqarlunga Inatsisartunit naammassisaaqarfiusumik siunnersuutip matuma suliarineqarnissaanut ingerlatippara.